

Adroddiad Archwilio
Blynyddol

2004 – 2005

Cynnwys

- A) Rhagair gan y Cynghorydd Mike Edwards,
Pencampwr Archwilio Cyngor Bwrdeistref Sirol Wrecsam Tudalen 2
- B) Rhagair gan Isobel Garner, Prif Weithredwr
Cyngor Bwrdeistref Sirol Wrecsam Tudalen 3
- C) Edrych yn Ôl Ebrill 2004 – Mawrth 2005 Tudalennau 4 - 7
- Ch) Edrych Ymlaen Ebrill 2005 – Mawrth 2006 Tudalennau 8 - 12

Atodiadau: Pwyllgorau Archwilio

Tudalennau 13–24

Atodiad 1: Pwyllgor Archwilio Plant a Phobl Ifanc

Atodiad 2: Pwyllgor Archwilio Materion Corfforedig (Sylwer bod y pwyllgor hwn wedi newid ei enw i'r Pwyllgor Archwilio Llywodraeth Gorfforedig a Pholisi)

Atodiad 3: Pwyllgor Archwilio Amgylchedd ac Adfywiad

Atodiad 4: Pwyllgor Archwilio Materion Ariannol (Sylwer bod y pwyllgor hwn wedi newid ei enw i'r Pwyllgor Archwilio Cyllid a Pherfformiad)

Atodiad 5: Pwyllgor Archwilio Materion Cymdeithasol, Iechyd a Thai

Adroddiad Blynyddol - Rhagair



Rhagair gan y Cynghorydd Mike Edwards,
Pencampwr Archwilio Cyngor Bwrdeistref Sirol
Wrecsam

Mae'n bleser gennyf ysgrifennu'r rhagair hwn ar gyfer Adroddiad Archwilio Blynyddol 2004 – 2005 yn ystod fy ail flwyddyn fel pencampwr archwilio ar gyfer Wrecsam. Gobeithiaf y bydd hwn, ein hail adroddiad blynyddol, yn caniatáu i'r Cyngor fyfyrion ar waith y pwyllgorau archwilio yn ystod y flwyddyn ddiwethaf a gweld rhai o'r cynlluniau ar gyfer y flwyddyn sydd i ddod.

Mae'r Adroddiad Archwilio Blynyddol yn cydnabod gwaith caled yr aelodau sydd wedi gwasanaethu ar y pwyllgorau archwilio yn y flwyddyn ddiwethaf a'r swyddogion sydd wedi cefnogi'r broses. Datgela'r cynnydd rydym wedi ei wneud ond cydnebydd fod angen gwneud mwy yn y flwyddyn sydd i ddod. Cynlluniwyd nifer o newidiadau a gwelliannau i wella cynnydd y broses archwilio ymhellach a chynorthwyo aelodau i ddatblygu eu gallu i wneud cyfraniad sylweddol i wella bywydau pobl Wrecsam.

Anelwn at godi ymwybyddiaeth o'r swyddogaeth archwilio yn ystod 2005 – 2006 a bwriadwn ganolbwyntio ar y materion mawr a fydd yn gwneud gwahaniaeth go iawn i bobl Wrecsam.

Unwaith eto, mae gennym flwyddyn gyffrous llawn her o'n blaenau ac rydym yn ei chroesawu.

Y Cynghorydd Mike Edwards
Pencampwr Archwilio
Cyngor Bwrdeistref Sirol Wrecsam



Rhagair gan Isobel Garner, Prif Weithredwr Cyngor Bwrdeistref Sirol Wrecsam

Rwy'n falch iawn o gael gwahoddiad i gyfrannu at yr ail Adroddiad Archwilio Blynyddol. Mae'r pwyllgorau archwilio'n parhau i chwarae rôl bwysig wrth ddod â gwelliannau i wasanaethau'r Cyngor ac maent yn hanfodol i'r broses o lunio'r polisïau sy'n cefnogi'r ffordd a weithiwn i gyflawni blaenoriaethau corfforedig y Cyngor.

Mae'r pwyllgorau wedi gwneud ystod eang o waith yn ystod y flwyddyn ddiwethaf sy'n amlwg o'u proffil yn rhai o'r prosiectau pwysig yr ymgwymerwyd â nhw. Mae'r aelodau newydd wedi ymgyfarwyddo â'u rolau yn dda ac yn arddangos eu sgiliau arolygu a herio. Rwy'n dal i edmygu faint o amser, ymroddiad ac ymdrech maent yn eu rhoi i'w gwaith. Yn benodol, tynnaf eich sylw at waith y Pwyllgor Archwilio Plant a Phobl Ifanc a gyflwynodd y meini prawf ar gyfer y dasg anodd iawn a sensitif o arolygu darpariaeth addysg ledled y sir i'r Bwrdd Gweithredol.

Mae'r adroddiad hwn yn cydnabod gwaith da a chynnydd y pwyllgorau yn y flwyddyn ddiwethaf ac yn gosod rhai targedau anodd iawn ar gyfer y flwyddyn i ddod. Bydd archwilio'n parhau i chwarae rôl hanfodol ac allweddol mewn gwella ein perfformiad a'n cyflawniad o amcan y Cyngor o ddarparu'r hyn sydd o bwys i bobl Wrecsam.

Cynigïaf fy nghefnogaeth lawn iddynt ac edrychaf ymlaen at gydweithio'n agos yn ystod yr hyn a ddisgwyliaf i fod yn flwyddyn gyffrous a llawn her.

Isobel Garner
Prif Weithredwr
Cyngor Bwrdeistref Sirol Wrecsam

Adroddiad Archwilio Blynyddol

Ebrill 2004 i Fawrth 2005

Dyma'r ail Adroddiad Archwilio Blynyddol sy'n ofynnol dan y cyfansoddiad yn dilyn diwygiadau a wnaed gan y Cyngor ym mis Medi 2003.

1. EDRYCH YN ÔL

1.1 Cefndir

- 1.1.1 Cytunodd y Cyngor ar ei drefniadau rheolaeth wleidyddol mwyaf cyfredol ym mis Mai 2002. Roedd y trefniadau hyn yn cynnwys pum pwyllgor archwilio presennol yr Awdurdod, gyda chyd-gadeiryddion yn cael eu penodi ar gyfer pob pwyllgor. Mae aelodaeth o'r pwyllgorau archwilio'n wleidyddol gytbwys.
- 1.1.2 Yn ogystal, mae cyd-gadeiryddion y pwyllgorau'n cyfarfod yn rheolaidd fel grŵp cydlynu i ddyrannu cyfrifoldeb am faterion nad ydynt yn dod o fewn cwmpas clir pwyllgor archwilio penodol ac i gadw arolwg o ran datblygiad parhaus y swyddogaeth archwilio.

1.2. Cynllun Gweithredu Archwilio

- 1.2.1 Yn adroddiad archwilio'r llynedd, bu i ni eich hysbysu y nodwyd y broses archwilio fel un o flaenoriaethau gwella allweddol yr Awdurdod yng Nghynllun Gwella Cyngor Bwrdeistref Sirol Wrecsam 2003/2004. Datblygwyd cynllun gweithredu i ymdrin â'r gwendidau canfyddedig yn y broses bresennol, gan ganolbwyntio ar:-

- Newidiadau i'r cyfansoddiad
- Arolwg o'r strwythur, trefniadau a phrosesau presennol
- Cynhyrchu cynllun blaengynllunio
- Rhaglen waith a arweinir gan aelodau
- Rhaglen datblygu aelodau sy'n seiliedig ar sgiliau
- Arolwg o'r adnoddau sydd eu hangen i gefnogi archwiliadau'n effeithiol
- Gwella rôl y cyhoedd a'n partneriaid yn y gwaith archwilio
- Codi ymwybyddiaeth staff o'r swyddogaeth archwilio

Gwelwyd gwelliannau sylweddol mewn sawl maes. Mae'r rhai allweddol yn cynnwys:-

Newidiadau i'r cyfansoddiad

- 1.2.2 Gan adeiladu ar ddiwygiadau a wnaed i'r cyfansoddiad yn y blynyddoedd blaenorol, cafwyd arolwg pellach yn ystod 2004 – 2005 i ychwanegu protocolau ychwanegol. Mae'r rhain wedi gwella'r swyddogaeth archwilio ac wedi rhoi esboniad cliriach i amodau gorchwyl pob un o'r pwyllgorau

archwilio, ymddygiad swyddogion ac aelodau mewn cyfarfodydd a mewn perthynas â materion cyfrinachol.

Arolwg o'r strwythur, trefniadau a phrosesau presennol

- 1.2.3 Yn ystod 2003 – 2004, datblygwyd rhestr wirio archwilio i alluogi aelodau i wneud arolygon archwilio mewn ffordd fwy strwythuredig a chyson. Mae datblygiad proses debyg ar gyfer cynnwys aelodau wrth ddatblygu ac arolygu polisïau'n cael ei ystyried ar hyn o bryd, gan adeiladu ar y sesiwn hyfforddiant lwyddiannus am ddatblygu polisi a gynhaliwyd ym mis Chwefror 2005.
- 1.2.4 Yn ogystal, diweddarwyd gweithdrefnau sy'n perthyn i'r broses archwilio yn y llawlyfr Gweithdrefnau Corfforedig sy'n cynnwys cyfarwyddyd ar sut gall swyddogion wneud cais i bwyllgorau archwilio ystyried eitemau ac amlinellu opsiynau o ran sut gellid darparu gwybodaeth er mwyn ei hystyried mewn cyfarfod archwilio.
- 1.2.5 Cafwyd arolwg o strwythurau'r pwyllgorau archwilio ers hynny a manylir ar y casgliadau dan adran Ch – 'Edrych Ymlaen'.

Rhaglen waith a arweinir gan aelodau

- 1.2.6 Gwnaed cynnydd sylweddol o ran sicrhau bod rhaglenni gwaith archwilio'n cael eu harwain fwy gan aelodau, yn canolbwyntio ar y tymor hwy ac ar faterion sy'n bwysig i aelodau. Fodd bynnag, mae'n dal i fod yn bwysig cael digon o hyblygrwydd i ganiatáu ar gyfer eitemau brys sy'n codi. Mae'r rhaglenni gwaith ar gael ar y fewnwyd a'r rhyngwyd erbyn hyn ac maent yn cael eu cylchredeg i aelodau a swyddogion yn rheolaidd.

Rhaglen datblygu aelodau

- 1.2.7 Yn dilyn archwiliad o sgiliau aelodau a wnaed yn 2003, cytunwyd ar raglen hyfforddiant ar gyfer datblygu sgiliau aelodau. Mae sesiynau datblygu a gynhaliwyd rhwng Ebrill 2004 a Mawrth 2005 wedi cynnwys sesiwn sefydlu aelodau archwilio ym mis Gorffennaf 2004, yn dilyn etholiadau'r fwrdeistref sirol. Yn ychwanegol, cynhaliwyd gweithdy arolygu a datblygu polisïau poblogaidd a gwerthfawr dros gyfnod o ddau ddiwrnod ym mis Chwefror 2005. Manylir ar wybodaeth ynghylch sesiynau pellach a drefnwyd dan adran Ch – 'Edrych Ymlaen'.

Arolwg o'r adnoddau sydd eu hangen i gefnogi archwiliadau'n effeithiol

- 1.2.8 Ym mis Ionawr 2003, cytunodd y Bwrdd Gweithredol i secondio swyddog i ddarparu'r gefnogaeth benodol gyntaf i'r broses archwilio. Gwnaed y swydd yn barhaol ym mis Ebrill 2004. Mae arolwg pellach o'r adnoddau sydd eu hangen i cefnogi'r broses archwilio'n effeithiol wedi arwain at estyn y tîm i gynnwys penodiad swyddog archwilio a chynorthwy-ydd archwilio/swyddog gweinyddol.

Gwella rôl y cyhoedd a phartneriaid yn y broses archwilio

- 1.2.9 Cafwyd rhai achlysuron cadarnhaol o gynnwys y cyhoedd, yn enwedig mewn perthynas â materion megis ffordd gyswllt Ystad Ddiwydiannol Wrecsam pan wahoddwyd aelodau o'r cyhoedd i gyflwyno eu barn yn uniongyrchol i

aelodau yn y cyfarfodydd archwilio. Yn ogystal, gwahoddwyd cynrychiolwyr o rai o'n cyrff partner ac asiantaethau allanol, megis yr heddlu, Asiantaeth yr Amgylchedd a Llywodraeth Cynulliad Cymru, i ddod i gyfarfodydd archwilio a chymryd rhan.

- 1.2.10 Mae mesurau yn eu lle hefyd i wella cyhoeddusrwydd a gwybodaeth ar wefan y Cyngor ymhellach. Mae hyn yn cynnwys rhaglenni gwaith archwilio, newyddlenni, cwestiynau a ofynnir yn aml a chysylltiadau i gofnodion ac agendâu pwyllgorau. Bwriedir meithrin cyswllt agosach ag Uned Cyfathrebiadau'r Cyngor er mwyn hybu'r swyddogaeth archwilio a'r materion sy'n cael eu hystyried.
- 1.2.11 Fodd bynnag, mae'r broblem o sut i ennyn diddordeb y cyhoedd yn y broses archwilio yn un sy'n profi i fod yn broblem genedlaethol yn ogystal â lleol.

Codi ymwybyddiaeth o'r swyddogaeth archwilio

- 1.2.12 Cynhaliwyd cyfarfod ar y cyd rhwng cyd-gadeirydd y grŵp cydlynu, y Prif Weithredwr, cyfarwyddwyr strategol a phrif swyddogion ym mis Ionawr 2005. Pwrpas y cyfarfod hwn oedd gweld sut gall aelodau a swyddogion gydweithio'n well er mwyn gwella'r swyddogaeth archwilio. Arweiniodd hyn at gynllun gweithredu ar y cyd sy'n cael ei weithredu a'i fonitro ar hyn o bryd. Bwriedir cynnal digwyddiad tebyg ym mis Hydref 2005.
- 1.2.13 Datblygwyd tudalen archwilio ar fewnrwyd y Cyngor ar gyfer aelodau a swyddogion a diweddarir hon yn rheolaidd. Cynhwyswyd gwybodaeth fel cwestiynau a ofynnir yn aml, gweithdrefnau archwilio, newyddlenni a rhaglenni gwaith archwilio ar y safle a cheir cysylltiadau i agendâu a chofnodion y pwyllgorau.
- 1.2.14 Ysgrifennwyd newyddlenni archwilio a dosbarthwyd y rhain i bob cyfarwyddwr a phrif swyddog. Rhoddodd y newyddlen gyntaf ym mis Hydref 2004 wybodaeth am archwilio'n gyffredinol, y prif swyddogaethau, yr egwyddorion allweddol, y pwyllgorau archwilio a rôl y tîm archwilio. Rhoddodd yr ail newyddlen ym mis Mawrth 2005 wybodaeth am sut i gynnwys eitem ar y rhaglenni gwaith archwilio a materion i swyddogion eu hystyried wrth fynychu cyfarfodydd y pwyllgorau archwilio. Mae rhai swyddogion wedi defnyddio'r newyddlenni hyn yng nghyfarfodydd eu timau rheoli. Gellir darllen y newyddlenni ar fewnrwyd y Cyngor.
- 1.2.15 Dosberthir rhaglenni gwaith i Dîm Rheolaeth Strategol y Cyngor, prif swyddogion ac aelodau bob tri mis ac maent yn cael eu cynnwys ar dudalen we archwilio mewnrwyd y Cyngor.

1.3 Arolwg y Comisiwn Archwilio o'r trefniadau archwilio

- 1.3.1 Yn ogystal â'r meysydd a nodwyd yng nghynllun gweithredu archwilio'r Cyngor (a ddisgrifiwyd uchod), ymgymerodd y Comisiwn Archwilio ag arolwg o drefniadau archwilio Wrecsam yn ystod 2003 – 2004. Cefnogodd yr arolwg hwn y casgliadau ond cynhwysodd argymelliad ychwanegol fel maes

gwella pellach, sef cefnogi Technoleg Gwybodaeth ac annog aelodau i'w defnyddio.

- 1.3.2 Mae gan 50 o'r 52 aelod gyfrifiaduron personol, ynghyd â chyfleusterau ebost a mynediad i'r rhyngwyd trwy gysylltiadau band eang erbyn hyn.

1.4 Rhwydweithio

- 1.4.1 Mae gwaith trwy rwydwaith Swyddogion Cefnogaeth Archwilio Gogledd Cymru (Ynys Môn, Conwy, Sir Ddinbych, Sir y Fflint, Gwynedd a Wrecsam) wedi bod yn symud yn ei flaen. Mae'r grŵp yn cyfarfod yn rheolaidd i drafod materion a phroblemau cyffredin a rhannu syniadau ac arfer gorau mewn perthynas â'r swyddogaeth archwilio.

- 1.4.2 Un darn o waith pwysig yw datblygiad Fframwaith Gwerthuso Archwilio Cymru Gyfan lle bu i Wrecsam chwarae rôl arweiniol. Gobeithir lansio'r fframwaith yn 2005.

1.5 Darlun cenedlaethol

- 1.5.1 Mae'r Ganolfan Archwiliad Cyhoeddus yn arolygu datblygiad y swyddogaeth archwilio'n genedlaethol. Cyhoeddwyd cyd-adroddiad gan y corff hwn a Chomisiwn Archwilio Cymru, o'r enw 'Archwilio yn Llywodraeth Leol Cymru', ym mis Ionawr 2005. Casglodd yr adroddiad:

“Mae archwilio wrth graidd agenda foderneiddio llywodraeth leol Cymru ac mae'n elfen hanfodol o archwiliad ehangach. Gall pwyllgorau archwilio ac arolygu (PAA) chwarae rôl allweddol yng ngwaith awdurdod lleol; cyfrannu at ddatblygiad y Cynllun Cymunedol statudol; cynorthwyo'r awdurdod i weithredu ei bwerau lles, ynghyd ag archwilio'r broses o wneud penderfyniadau'n effeithiol. Dylai PAA fod yn fforymau ar gyfer gweithio mewn partneriaeth, dod â'r chwaraewyr allweddol at ei gilydd, cysylltu dulliau arolygu â pholisïau a chanolbwyntio allbynnau rheoliadau er mwyn hybu gwelliant a gwella atebolrwydd.

“Er gwaethaf arwyddion o welliant a chydabyddiaeth gynyddol cynghorau o botensial PAA, cytunir yn gyffredinol nad yw'r swyddogaeth archwilio ym maes llywodraeth leol Cymru'n gweithio mor effeithiol ag y dylai hyd yma. Er mwyn mwyhau ei chyfraniad, rhaid ymsefydlu pwysigrwydd archwilio yn niwylliant cynghorau Cymru. Dylai pob awdurdod feddu ar ddarpariaeth gefnogi gref ag adnoddau da ar gyfer y swyddogaeth hon. Trwy adeiladu ar yr arfer da presennol, gweithredu egwyddorion archwilio da a rhannu syniadau a phrofiadau, gall llywodraeth leol Cymru ddefnyddio'r broses archwilio fel catalydd effeithiol i lywodraethu'n well a pharhau i wella.”

- 1.5.2 Amlyga'r adroddiad Wrecsam fel enghraifft o arfer gorau ym maes ennyn diddordeb y cyhoedd mewn perthynas â'r gwaith a wnaed gan y Pwyllgor Archwilio Materion Corfforedig ar fynediad i gerbydau i Fynwent Wrecsam.

1.6 Casgliad

- 1.6.1 Mae'n glir bod y swyddogaeth archwilio wedi symud yn ei blaen yn sylweddol yn y flwyddyn ddiwethaf ac mae proses a arweinir fwyfwy gan aelodau wedi ei datblygu, mae aelodau'n deall mwy am y broses ac mae tîm cefnogi penodedig wedi ei greu.

Fodd bynnag, mae angen mwy o gynnydd a manylir ar y gwaith hwn yn yr adran nesaf 'Edrych Ymlaen'.

2. EDRYCH YMLAEN **– CAEL GWELLIANNAU PELLACH**

2.1 Darparu rhaglenni hyfforddiant

- 2.1.1 Er mwyn gwella sgiliau a gwybodaeth aelodau ymhellach ac felly gwella effeithiolrwydd y swyddogaeth archwilio, mae nifer o sesiynau datblygu aelodau sy'n ymwneud â'r swyddogaeth archwilio wedi cael neu'n cael eu trefnu yn y flwyddyn i ddod. Mae'r rhain yn cynnwys sgiliau a dulliau cadeirio (a nodwyd fel angen datblygu gan Swyddfa Archwilio Cymru), a ddylai wella agwedd aelodau at baratoi a chadeirio cyfarfodydd cymhleth. Bydd y meysydd eraill i'w cynnwys yn y rhaglen yn cynnwys datblygu ac arolygu polisi, rheoli perfformiad a dadansoddiad ariannol.

2.2 Gwell cyswllt â swyddogion allweddol

- 2.2.1 Yn dilyn y cyd-gyfarfod llwyddiannus rhwng cyd-gadeiryddion archwilio ac uwch reolwyr yr Awdurdod ym mis Ionawr 2005, bwriedir cynnal ail sesiwn ym mis Hydref 2005. Bydd hwn yn gyd-gyfarfod rhwng cyd-gadeiryddion archwilio, y Prif Weithredwr, cyfarwyddwyr strategol a phrif swyddogion unwaith eto a bydd yn arolygu cynnydd yn erbyn y cynllun gweithredu cytunedig a gynhyrchwyd yn dilyn y cyd-gyfarfod cyntaf ac yn nodi ffyrdd eraill ar gyfer gwella'r swyddogaeth archwilio ymhellach.
- 2.2.2 Yn ogystal, cynhelir cyfarfodydd rhwng pob pâr o gyd-gadeiryddion archwilio a'r swyddogion priodol i helpu i flaengynllunio'r rhaglenni gwaith archwilio.

2.3 Gwell cyhoeddusrwydd ac ymwybyddiaeth ymysg staff

- 2.3.1 Bwriedir gwneud mwy o ymdrech i godi ymwybyddiaeth o'r swyddogaeth archwilio ymysg staff ar bob lefel trwy'r fewnwyd, Diweddariad (cylchgrawn staff y Cyngor) a newyddlenni. Byddai hyn yn ychwanegol i'r cyd-gyfarfodydd â swyddogion allweddol a ddisgrifir uchod.

- 2.3.2 Bydd modd gweld y rhaglenni gwaith archwilio ar y fewnwyd a byddant yn cael eu cylchredeg bob 3 mis. Bydd unigolion priodol yn mynd i gyfarfodydd adrannol hefyd i helpu swyddogion i ddeall prif egwyddorion archwilio a sut mae'n gweithio.

2.4 Cynnwys y cyhoedd a phartneriaid

- 2.4.1 Parhawn i ddiweddarau'r dudalen we archwilio i ganiatáu i'r cyhoedd ac asiantaethau sy'n bartneriaid i weld gwybodaeth am archwilio yn Wrecsam. Mae'r dudalen eisoes yn cynnwys rhaglenni gwaith archwilio, manylion cyswllt, trefniadau rheolaeth wleidyddol, newyddlenni, cwestiynau a ofynnir yn aml, aelodaeth y pwyllgorau a chysylltiadau i gofnodion ac agendâu'r pwyllgorau.
- 2.4.2 Bydd y tîm archwilio, ar y cyd ag Uned Cyfathrebiadau'r Cyngor, yn gweithio ar syniadau i godi proffil archwilio yn Wrecsam. Bydd hyn yn cynnwys datganiadau i'r wasg ac erthyglau i dynnu sylw'r cyhoedd ac erthyglau tynnu sylw 'Beth Sy'n Newydd' ar y rhyngwyd.
- 2.4.3 Rhaid ystyried symud y swyddogaeth archwilio i ffwrdd o Neuadd y Dref hefyd a chynnal cyfarfodydd mewn llyfrgelloedd, ysgolion, canolfannau cymuned, ayb. Fodd bynnag, bydd hyn yn llwyddo dim ond os cefnogir ef gan sylw yn y wasg leol ac ar wefan y Cyngor ac os yw'r eitemau ar yr agenda'n berthnasol ac o ddiddordeb i'r cyhoedd.
- 2.4.4 Mae'n amlwg bod gofyn i ni wneud mwy i gynnwys y cyhoedd a chyrrff partner yn y broses archwilio ac mae cynlluniau yn eu lle i gynnwys budd-ddeiliaid yn fwy yn ystod 2005 – 2006. Dyma rai enghreifftiau penodol:
- Cyd-gyfarfod rhwng y Pwyllgor Archwilio Materion Cymdeithasol, Iechyd a Thai a'r Bartneriaeth Tenantiaid ac Aelodau ym mis Mai 2005. Trefnwyd ymweliadau ag eiddo ar gyfer aelodau a'r Bartneriaeth Tenantiaid ac Aelodau hefyd.
 - Mae Pennaeth Coleg Addysg Bellach Iâl wedi cytuno i fynychu'r Pwyllgor Archwilio Plant a Phobl Ifanc ym mis Mehefin 2005 i drafod addysg ôl-16 yn Wrecsam ac, yn benodol, materion sy'n ymwneud â darpariaeth yng Ngholeg Iâl. Mae wedi estyn gwahoddiad i'r Pwyllgor Archwilio Plant a Phobl Ifanc ddod i weld cyfleusterau Coleg Iâl a gobeithir gwneud hyn ym mis Tachwedd 2005.
 - Mae'r Pwyllgor Archwilio Amgylchedd ac Adfywiad wedi cynnwys cynrychiolwyr o gyrff allanol, megis LICC ac Asiantaeth yr Amgylchedd, mewn arolygon a wnaed gan y Pwyllgor. Yn yr un modd, mae cynrychiolwyr o Heddlu Gogledd Cymru wedi dod i gyfarfodydd y Pwyllgor Archwilio Materion Corfforedig yn rheolaidd pan drafodir materion sy'n perthyn i'r cynllun wardeiniaid cymdogaeth.
- 2.4.5 Rhaid ystyried datblygu canllawiau mwy ffurfiol ar gyfer caniatáu'r cyhoedd a chyrrff allanol i siarad a darparu gwybodaeth mewn cyfarfodydd archwilio (cyn belled ag y bo'n berthnasol i'r eitem ar yr agenda). Yn ogystal, mae'n rhaid i ni ddatblygu ffyrdd a fydd yn caniatáu i'r cyhoedd a chyrrff allanol godi

materion o bryder iddynt er mwyn i aelodau eu hystyried a'u cynnwys yn eu rhaglenni gwaith yn y dyfodol.

2.5. Arolygu a gwerthuso

- 2.5.1 Fel yr amlygwyd yn gynharach yn yr adroddiad, mae swyddogion archwilio o Wrecsam wedi chwarae rôl flaengar mewn datblygu fframwaith hunan-werthuso gwaith archwilio i Gymru.
- 2.5.2 Mae'r Grŵp Cydlynu wedi cytuno i gael arolwg o effeithiolrwydd y broses archwilio a'r trefniadau i gefnogi gwaith archwilio yn ystod 2005 – 2006 er mwyn adnabod meysydd gwella neu newid. Gobeithir y bydd y fframwaith hunan-werthuso'n helpu'n fawr gyda'r broses hon.
- 2.5.3 Bydd rhan o'r arolwg hwn yn gofyn am asesiad o effaith gwaith archwilio ar welliannau a newidiadau i wasanaethau a pholisïau'r Cyngor. Mae rhai enghreifftiau penodol y gellid eu hystyried fel rhan o'r asesiad hwn yn cynnwys:
- y gwaith a wneir i werthuso gweithrediad ac effeithiolrwydd y cynllun wardeiniaid cymdogaeth (gan y Pwyllgor Archwilio Llywodraeth Gorfforedig a Pholisi)
 - gwerthuso effeithiolrwydd y broses rheoli prosiect a ddefnyddiwyd ar gyfer prosiectau ysgol Rhos a Choedpoeth (gan y Pwyllgor Archwilio Cyllid a Pherfformiad)
 - Monitro a gwerthuso effeithiolrwydd y gofal seibiant yn Fflat Adfer Springfield gan y Pwyllgor Archwilio Materion Cymdeithasol, Iechyd a Thai)

2.6. Methodoleg ar gyfer datblygu ac arolygu polisïau a chynlluniau

- 2.6.1 Gan adeiladu ar y gwaith a wnaed eisoes, bwriedir datblygu methodoleg yn ystod 2005/6, i'w chymeradwyo gan aelodau a swyddogion, er mwyn cynnwys archwilio mewn materion sy'n perthyn i bolisi. Bydd y fethodoleg hon yn sicrhau bod aelodau archwilio'n cael eu cynnwys wrth ddatblygu polisi ar yr adeg gywir ac mewn ffordd ystyrlon.

2.7 Monitro perfformiad

- 2.7.1 Mae'r Grŵp Cydlynu wedi dyrannu cyfrifoldeb am fonitro cyflawniad pob un o flaenoriaethau corfforedig yr Awdurdod ar gyfer 2005- 2008 fel y fanylir arnynt isod:
- **Gwella safonau a chyrrhaeddiad addysgol** - *Plant a Phobl Ifanc*
 - **Gwella gwasanaethau cymdeithasol yn seiliedig ar y cyd-arolwg** – *Materion Cymdeithasol, Iechyd a Thai*
 - **Glyniad cymunedol** – *Materion Corfforedig (Llywodraeth Gorfforedig a Pholisi erbyn hyn)*
 - **Busnesau ffyniannus, gweithlu medrus a chymunedau adfywiedig** – *Amgylchedd ac Adfywiad*

- **Cynyddu ailgylchu a lleihau claddu sbwriel** – *Amgylchedd ac Adfywiad*
- **Gwella cyswllt â chwsmeriaid a galluogi'r Cyngor i ddeall eu hanghenion a dymuniadau** – *Materion Corfforedig*
- **Rhyddhau adnoddau i yrru cyflawniad blaenoriaethau'r Cyngor a gwella perfformiad gwasanaethau yn ei flaen** – *Ariannol (Cyllid a Pherfformiad erbyn hyn)*
- **Gwella'r stoc tai** – *Materion Cymdeithasol, Iechyd a Thai*
- **Sicrhau gwasanaeth ymatebol i blant a phobl ifanc** – *Plant a Phobl Ifanc*
- **Lleihau troseddau ac ofn pobl am droseddau** – *Materion Corfforedig*
- **Gwella iechyd, gofal cymdeithasol a lles** – *Materion Cymdeithasol, Iechyd a Thai*
- **Gwella ffyrdd a chlodiant** – *Amgylchedd ac Adfywiad*
- **Hybu'r iaith Gymraeg a diwylliant Cymru** – *Plant a Phobl Ifanc*
- **Gwella ansawdd yr amgylchedd lleol** – *Amgylchedd ac Adfywiad*

2.7.2 Gwnaed peth gwaith eisoes i ddechrau adnabod ac arolygu'r polisïau presennol ar gyfer pob blaenoriaeth gorfforedig yn ogystal â meysydd lle mae'n ymddangos nad oes polisïau'n bodoli neu lle maent yn aneglur.

2.8 Canolbwyntio ar y 'materion mawr'

2.8.1 Bydd rhai 'materion mawr' i aelodau archwilio eu hystyried fel rhan o'u rhaglenni gwaith ac mae gwaith eisoes wedi dechrau ar adnabod rhai o'r materion hyn. Mae'r rhain yn cynnwys y canlynol a gynhwyswyd mewn rhaglenni gwaith archwilio yn ystod hydref 2005.

- Proses gyllidebol 2006/7
- Effeithiolrwydd corfforedig/gweithio ar y cyd
- Perfformiad a chanlyniadau addysg
- Gweithlu medrus – materion ac anawsterau yn Wrecsam
- Canlyniadau'r archwiliad o ganolfannau cymuned
- Mynwent Wrecsam (anghenion a dewisiadau) a'r Amlogsgfa (goblygiadau cyfarwyddiadau'r UE)
- Wardeiniaid cymdogaeth (effeithiolrwydd y cynllun)
- Blaenoriaethu prosiectau'r Rhaglen Cyfalaf Tai

2.9 Ailstrwythuro trefniadau archwilio

2.9.1 Ymgwymerir ag arolwg o'r strwythur, amodau gorchwyl ac aelodaeth o'r pwyllgorau archwilio gyda'r nod o gyflwyno cynigion i gyfarfod blynyddol y Cyngor ym mis Mai 2005. Cafwyd trafodaethau rhwng y Grŵp Cydlynu a'r Gweithgor Datblygu Aelodau ar Gyfer Swyddogion ac Aelodau ac mae'r prif gynigion fel a ganlyn:

- Y Pwyllgor Archwilio Materion Corfforedig i ddod yn Bwyllgor Archwilio Llywodraeth Gorfforedig a Pholisi

- Y Pwyllgor Archwilio Ariannol i ddod yn Bwyllgor Archwilio Cyllid a Pherfformiad
- Ailstrwythuro aelodaeth y pum pwyllgor archwilio, pob un i gael aelodaeth wleidyddol gytbwys o 13

Atodiad 1

PWYLLGOR ARCHWILIO PLANT A PHOBL IFANC

AELODAETH 2004/2005

Cyd-gadeiryddion (2):	Mrs Shân Wilkinson OBE	G W Griffiths
Aelodau (12):	Paul Blackwell Ron Davies T Alan Edwards J M Humberstone George D James J A Kelly KSG	M G Morris Colin Powell D N Price I Roberts Christopher M Stubbs Malcolm Williams
Cynrychiolwyr o'r Eglwys/Rhiant Lywodraethwr (4):	Mr B Evans Mr M Greaney	Mrs J A Whitley 1 swydd wag
Cydlynnydd swyddog arweiniol:	Karen Mills Swyddog Archwilio	
Gwasanaethodd y cynghorwyr canlynol ar y pwyllgor cyn etholiadau Mehffin 2004 (rhwng Ebrill a Mehffin 2004):	R W Caldecott Sheila Griffiths P Jeffares A G Jones	M H R Moysen R D Prince Aled R Roberts Cyd-gadeirydd H T Williams Cyd- gadeirydd
Gwasanaethodd y cynrychiolwyr canlynol o'r eglwys/rhieni lywodraethwyr ar y pwyllgor hefyd	Mr P R Williams	Mrs S F C Winson

AMODAU GORCHWYL

Gwasanaethau a swyddogaethau:-

- **Gwasanaethau cymdeithasol** gan gynnwys: diogelu plant; plant mewn angen; iechyd plant; plant ag anableddau; iechyd meddwl plant a phobl ifanc; plant y gofelir amdanynt; maethu a mabwysiadu.
- **Addysg a dysgu:** gan gynnwys: addysg blynyddoedd cynnar, addysg gynradd, uwchradd ac ôl-16; gwasanaethau perthynol gan gynnwys anghenion arbennig, cludiant ysgol, llyfrgelloedd ysgol, prydau ysgol, adeiladau/ cyfarpar ysgolion, derbyniadau a grantiau myfyrwyr.
- **Gwasanaeth ieuencid a'r gwasanaeth troseddau ieuencid**

- **Hamdden i'r rhai dan 18 oed**

Prif gynlluniau a strategaethau:-

Cynllun Cefnogi Ymddygiad; Cynllun Gwasanaethau Plant; Cynllun Datblygu'r Blynyddoedd Cynnar; Cynllun Strategol Addysg; Cynllun Trefniadaeth Ysgolion; Cynllun Cyfiawnder Ieuenctid; Partneriaeth Fframwaith Plant a Phobl Ifanc; Cynllun Strategol y Bartneriaeth Plant a Phobl Ifanc.

GWYBODAETH BELLACH

Yn ystod Ebrill 2004 a Mawrth 2005:

1. Cynhwysai'r Pwyllgor Archwilio Plant a Phobl Ifanc 14 aelod (gan gynnwys cyd-gadeiryddion) yn ogystal â 4 cynrychiolydd o'r eglwysi a rhieni lywodraethwyr.
2. Bu i'r Pwyllgor gyfarfod **10** tro yn ystod y 12 mis.
3. Cyfartaledd y presenoldeb yn y cyfarfodydd oedd rhyw **68%** (cyfartaledd y flwyddyn flaenorol oedd 60 %).
4. Canolbwyntiodd y Pwyllgor Archwilio ar faterion addysg yn bennaf yn y flwyddyn ddiwethaf, o bosibl ar draul meysydd eraill o gyfrifoldeb y Pwyllgor. Canolbwyntiwyd yn benodol ar y materion hynny sy'n perthyn i brif flaenoriaeth gorfforedig y Cyngor o godi cyrhaeddiad addysgol. Roedd y meysydd a berthynai i elfen addysg o gyfrifoldeb y Pwyllgor a archwiliwyd yn ystod y flwyddyn yn cynnwys:-
 - Polisiâu cludiant ysgol (gweler isod hefyd)
 - Addysg ôl-16
 - Darpariaeth addysg/rhaglen gyfalaf
 - Perfformiad a chyrhaeddiad addysgol (eitemau cyson)
 - Data teulu Fischer (sesiwn ddatblygu ymarferol)
 - Anghenion addysgol arbennig
5. O ran elfennau anaddysgol y gwaith a wnaed gan y Pwyllgor, archwiliwyd y materion canlynol:-
 - Gwasanaethau ieuenctid
 - Gwasanaethau troseddau ieuenctid
 - Mabwysiadu a maethu plant y gofelir amdanynt (polisi tymor hir)
 - Archwiliad o wasanaethau i blant mewn angen (mewn ymateb i argymhellion arfer Ymchwiliad Victoria Climbié)
 - Datblygu chwarae i blant a phobl ifanc yn Wrecsam
 - Strategaeth chwarae corfforol ar gyfer yr ardal
 - Arolwg strwythurol o blant a phobl ifanc (diweddariadau)

6. Arweiniodd y Pwyllgor hwn y ffordd yn 2003–2004 o ran defnyddio grwpiau byr dymor i gynyddu gallu'r Pwyllgor i archwilio rhai materion penodol. Symudwyd hyn ymlaen ymhellach yn 2004–2005. Parhaodd y Grŵp Byr Dymor Polisiâu Cludiant Ysgol ei waith i mewn i 2004–2005. Profodd yr arolwg hwn i fod yn ddarn pwysig o waith y mae ei gwmpas yn cynnwys cludiant ysgol, derbyniadau gan eu bod yn effeithio ar gludiant ysgol a theithiau peryglus. Cytunodd y Bwrdd Gweithredol ar y Polisi Teithiau Peryglus diwygiedig ym mis Chwefror 2005. Bydd angen rhagor o waith ar weddill yr arolwg hwn ond disgwylir iddo ddod i ben ym mis Mehefin 2005. Yn ychwanegol, sefydlwyd dau grŵp byr dymor arall i edrych ar anghenion addysgol arbennig a darpariaeth addysgol.
7. Mae'r Pwyllgor hwn wedi arddangos enghreifftiau o arfer da o ran profi bod y swyddogaeth archwilio'n cael ei harwain gan aelodau. Er enghraifft, paratodd a chyflwynodd y Pwyllgor ei adroddiad pwyllgor archwilio ei hun i'r Bwrdd Gweithredol ym mis Chwefror 2005 mewn perthynas â'r Polisi Teithiau Peryglus (canlyniad o Grŵp Byr Dymor Cludiant Ysgol y Pwyllgor). Mae'r Pwyllgor yn cynllunio agwedd debyg at gyflwyno eu hargymhellion pan fydd arolygon y grwpiau byr dymor eraill (polisiâu cludiant ysgol, darpariaeth addysg ac anghenion addysgol arbennig) yn dod i ben.

Mewn partneriaeth â swyddogion addysg, mae'r Pwyllgor hwn yn trefnu gweithdy ar gyfer aelodau ar hyn o bryd a fydd yn canolbwyntio ar dargedau ar gyfer cyrhaeddiad addysgol (sy'n flaenoriaeth gorfforedig) i alluogi aelodau i ddeall mwy am y broses o osod targedau er mwyn iddynt allu herio'r targedau addysg a osodir yn y Cynllun Gwella Drafft. Bydd y gweithdy hwn yn cynnwys safbwyntiau ysgolion, yr AALI, rhiant lywodraethwr, y Pwyllgor Archwilio Plant a Phobl Ifanc a'r Bwrdd Gweithredol. Bwriedir cynnal y digwyddiad hwn ym mis Mai 2005.

8. Defnyddiwyd ystod amrywiol o dulliau i gyflwyno gwybodaeth yn y cyfarfodydd pwyllgor ac anogwyd hyn gan aelodau'r pwyllgor er mwyn gwneud y cyfarfodydd yn fwy diddorol a sicrhau bod y wybodaeth yn cael ei chyflwyno'n glir. Mae'r dulliau o gyflwyno gwybodaeth wedi cynnwys cyflwyniadau PowerPoint, adroddiadau, gweithdai ymarferol ac astudiaethau achos. Er enghraifft, defnyddiwyd gweithdy ac astudiaethau achos i helpu aelodau i ddeall sut y gellir defnyddio data Fischer i helpu i wella perfformiad yn yr ysgol.

PWYLLGOR ARCHWILIO MATERION CORFFOREDIG

AELODAETH 2004/2005

Cyd-gadeiryddion (2)	Ron Davies	R J Dutton OBE
Aelodau (8):	Paul Blackwell Judith C Connolly R Mark Davies M G Morris	F A Nichols Colin Powell R D Prince David Rogers
Cydllynydd Swyddog Arweiniol:	Keith Lea Rheolwr Archwilio	
Gwasanaethodd y cynghorwyr canlynol ar y Pwyllgor cyn etholiadau Mehefin 2004 hefyd (rhwng Ebrill a Mehefin 2004):	Mrs Mollie Beresford M J Edwards (cyd-gadeirydd) R B Evans A G Jones	M H R Moysen David Rogers (cyd-gadeirydd) Cyril Williams

AMODAU GORCHWYL

Gwasanaethau a Swyddogaethau

- **Polisiâu strategol cyffredinol** gan gynnwys: cynllun gwella; strategaeth gymunedol; strategaeth gorfforedig; rheoli perfformiad; rheoli eiddo, ynni ac asedau; cyfathrebiadau/cysylltiadau cyhoeddus; mynediad cwsmeriaid i wasanaethau; caffael; troseddu ac anhrefn; pobl ifanc sy'n niwsans; materion sy'n perthyn i'r heddlu
- **Personél** gan gynnwys: cyfle cyfartal; materion staffio; iechyd a diogelwch
- **TG a thelathrebu**
- **Cyfreithiol** gan gynnwys: materion cyfreithiol; hyfforddi a datblygu aelodau; gwasanaethau pwyllgora a maerol; gwasanaethau cofrestru a'r crwner

Prif gynlluniau a strategaethau

Strategaeth Gymunedol; Datganiad y Strategaeth Gorfforedig; Cynllun Gwella; Strategaeth Lleihau Troseddau ac Anhrefn; Cynllun Iaith Gymraeg; Cynlluniau Rheoli Asedau.

GWYBODAETH BELLACH

Yn ystod y cyfnod Ebrill 2004 a Mawrth 2005:

1. Cynhwysai'r Pwyllgor Archwilio Materion Corfforedig o 10 aelod (gan gynnwys cyd-gadeiryddion).
2. Bu i'r Pwyllgor gyfarfod **10** tro yn ystod y flwyddyn.

3. Cyfartaledd y presenoldeb yn y cyfarfodydd oedd **66%** (roedd yn 72% yn y flwyddyn flaenorol).
4. Mae gan y Pwyllgor Archwilio hwn gyfrifoldebau helaeth, yn delio â llawer o'r polisiau cyffredinol sy'n effeithio ar yr Awdurdod ac ystyried eitemau nad ydynt i weld yn dod o fewn cyfrifoldebau'r pwyllgorau archwilio eraill. Adlewyrchir hyn yn yr ystod eang o eitemau gwaith a archwiliwyd yn ystod y flwyddyn. Mae'r prif rai fel a ganlyn:-
 - Cynllun rheoli asedau corfforedig 2004/2009 (mabwysiadwyd y maes hwn wedyn gan y Gweithgor Rheoli Asedau Aelodau a Swyddogion ar y Cyd a ailsefydlwyd)
 - Trefniadau cydweithio / cydweithredu ag awdurdodau eraill
 - Pobl ifanc sy'n creu niwans
 - Cynllun Gwella 2004/05
 - Monitro'r Strategaeth Gymunedol
 - Datblygiad aelodau a chyfathrebu
 - Wardeiniaid cymdogaeth
 - Ysmygu yn yr ysgol
 - Monitro personél
 - Strategaeth Caffaeliad
 - Trefniadau rheoli argyfyngau
5. Yn benodol, canolbwyntiodd gwaith y Pwyllgor ar ddau fater. I ddechrau, mae ganddo rôl allweddol mewn monitro blaenoriaeth gorfforedig yr Awdurdod o ran lleihau troseddu ac ofn pobl o droseddu ac, yn benodol, effeithiolrwydd y cynllun wardeiniaid cymdogaeth. Gwahoddwyd cynrychiolwyr o Heddlu Gogledd Cymru i nifer o gyfarfodydd i gyflwyno eu barn a rhoi gwybodaeth ac esboniadau pellach lle bu angen.
6. Yr ail prif faes gwaith yw monitro perfformiad materion personél gan fod yr adnodd staffio'n cynrychioli ased mwyaf y Cyngor a'r maes mwyaf o wariant.
7. Parhaodd y Grŵp Byr Dymor Pobl Ifanc sy'n Niwsans, sy'n cynnwys y cynghorwyr R Mark Davies, Ron Davies a Colin Powell, â'i waith yn ystod y flwyddyn. Er ei fod yn dal i fynd, gobeithia'r grŵp adrodd yn ôl i'r prif bwyllgor archwilio a chyflwyno ei ganlyniadau ac argymhellion erbyn diwedd 2005.

PWYLLGOR ARCHWILIO AMGYLCHEDD AC ADFYWIAD

AELODAETH 2004/2005

Cyd-gadeiryddion (2) :	A C Bailey	J R Skelland
Aelodau (12) :	Terry Evans Mrs June Fearnall K H Hett J M Humberstone Geoff Lowe Paul H Pemberton	R D Prince Mark Pritchard David Rogers Christopher M Stubbs Malcolm Williams Michael Williams
Cydlynnydd Swyddog Arweiniol:	Keith Lea Rheolwr Archwilio	
Gwasanaethodd y cynghorwyr canlynol ar y Pwyllgor cyn etholiadau Mehfin 2004 hefyd (rhwng Ebrill a Mehefin 2004):	R W Caldecott R B Evans (cyd-gadeirydd) Sylvia Greenaway Sheila Griffiths Malcolm Hughes	I Roberts Mrs J M B Roberts M J Vickers Cyril Williams J Woodrow (cyd- gadeirydd)

AMODAU GORCHWYL

Gwasanaethau a swyddogaethau

- **Cynllunio** gan gynnwys: materion cynllunio lleol, rhanbarthol a strwythurol; rheoli adeiladu; cadwraeth
- **Rheoli gwastraff** gan gynnwys: casglu sbwriel; glanhau strydoedd; gwaredu gwastraff; ailgylchu
- **Priffyrdd** gan gynnwys: cynnal a chadw a gwella ffyrdd a llwybrau troed; goleuadau stryd
- **Cludiant** gan gynnwys: diogelwch y ffyrdd; cludiant cyhoeddus; meysydd parcio
- **Diogelu'r cyhoedd** gan gynnwys: hybu iechyd; diogelwch bwyd; safonau masnach; wardeiniaid anifeiliaid
- **Datblygiad economaidd** gan gynnwys: datblygiad ac adfywiad trefol a gwledig; twristiaeth; cefnogi busnesau
- **Llyfrgelloedd**

Prif gynlluniau a strategaethau

Gorfodi Cyfreithiau Bwyd; Cynllun Cludiant Lleol; Cynllun Datblygu Unedol; Strategaeth Datblygiad Economaidd; Strategaeth Rheoli Gwastraff.

GWYBODAETH BELLACH

Yn y cyfnod rhwng Ebrill 2004 a Mawrth 2005:

1. Cynhwysai'r Pwyllgor Archwilio Amgylchedd ac Adfywiad o 14 aelod (gan gynnwys cyd-gadeiryddion).
2. Bu i'r Pwyllgor gyfarfod **9** tro yn ystod y flwyddyn.
3. Cyfartaledd y presenoldeb yn y cyfarfodydd oedd **68%** (yn union yr un fath â'r flwyddyn flaenorol).
4. Roedd y prif faterion a ystyriwyd yn ystod y flwyddyn yn cynnwys:-
 - Cynllun Ffordd Gyswllt Ystad Ddiwydiannol Wrecsam
 - Strategaeth Ddrafft yr Adran Datblygiad Economaidd 2004-07
 - Cynllun Casglu Sbwriel/Ailgylchu
 - Arolwg o'r Cynllun Cludiant Lleol 2001-2006
 - Adfywiad gwledig yn Wrecsam
 - Taliadau meysydd parcio
 - Canolfannau cymuned/ariannu neuaddau pentref
 - Cynllun Gweithredu Strategol Cymuned Broughton 2004-07
 - Strategaeth Digwyddiadau Datblygiad Economaidd 2004-07
 - Cronfa Adfywiad Corfforol (PRF)
5. Unwaith eto, mae gan y Pwyllgor Archwilio hwn gyfrifoldebau helaeth, sy'n cynnwys datblygiad economaidd ac adfywiad, ffyrdd a chludiant, cynllunio a gwastraff. Ystyriwyd materion sy'n ymwneud â'r rhan fwyaf o'r uchod i rai raddau yn ystod y flwyddyn ddiwethaf.
6. Nid oes amheuaeth bod yr arolwg o'r dewisiadau ar gael o ran y ffordd gyswllt arfaethedig i Ystad Ddiwydiannol Wrecsam wedi bod y mater unigol mwyaf y mae'r Pwyllgor hwn wedi ei drafod, o ran diddordeb gan y cyhoedd a'r amser y mae'r Pwyllgor wedi ei roi iddo. Mae'r Pwyllgor wedi arwain y ffordd a chaniatáu i'r cyhoedd a chyrrff allanol siarad a chyflwyno barn. Yn wir, mae'r drafodaeth wedi arwain at ddewis ychwanegol i'r rhai a amlinellwyd ar y cychwyn, sef mabwysiadu'r elfen ddeheuol fel y dewis ffordd.
7. Gwnaeth y Pwyllgor ymdrech i ddenu sylw'r cyhoedd trwy gynnal un cyfarfod yn Neuadd Goffa Gresford nd, yn anffodus, bu'n aflwyddiannus ac mae hyn yn amlygu'r problemau y mae'r swyddogaeth archwilio yn eu hwynebu wrth ennyn diddordeb y cyhoedd.

PWYLLGOR ARCHWILIO ARIANNOL

AELODAETH 2004/2005

Cyd-gadeiryddion (2):	J J Colbert	M J Edwards
Aelodau (8):	Nick S Colbourne Judith C Connolly R Mark Davies R J Dutton OBE	F K Edwards George D James Mrs Gwyneth Roberts Michael Williams
Cydllynydd Swyddog Arweiniol:	Keith Lea Rheolwr Archwilio	
Gwasanaethodd y cynghorwyr canlynol ar y Pwyllgor cyn etholiadau Mehefin 2004 hefyd (rhwng Ebrill a Mehefin 2004):	D Broderick George J Crisp R B Evans	P Jeffares J Woodrow M J Vickers (cyd-gadeirydd)

AMODAU GORCHWYL

Gwasanaethau a swyddogaethau

- **Cyllid:** agweddau ariannol unrhyw wasanaeth, prosiect neu swyddogaeth; statws ac adnoddau ariannol cyffredinol y Cyngor; strategaethau buddsoddi, benthyg ac yswiriant corfforedig y Cyngor; materion ariannol unrhyw gyd-fentrau, partneriaethau neu gwmnïau y mae gan y Cyngor fuddiant ynddynt
- **Archwilio:** hybu rheolaeth fewnol, creu diwylliant gwrthdwyll ac arolwg o'r rheoliadau ariannol; monitro'r archwilywyr gan gynnwys arolygu cynlluniau archwilio, penodi archwilydd allanol, arolygu perfformiad archwilywyr a chyfathrebu â'r archwilydd allanol, monitro'r Cyngor gan gynnwys helpu i gynnal cyswllt rhwng archwilywyr a staff, a derbyn y llythyr archwiliad blynyddol ar gyfer aelodau gan yr archwilydd allanol cyn ei gyflwyniad i'r Bwrdd Gweithredol

Prif gynlluniau a strategethau

Strategaeth Rheoli'r Trysorlys; Cynlluniau Cyllideb; Rheoliadau Ariannol; Cynlluniau Archwilio.

GWYBODAETH BELLACH

Yn y cyfnod Ebrill 2004 a Mawrth 2005:

1. Cynhwysai'r Pwyllgor Archwilio Ariannol o 10 aelod (gan gynnwys cyd-gadeiryddion).
2. Bu i'r Pwyllgor gyfarfod **10** tro yn ystod y flwyddyn.

3. Cyfartaledd presenoldeb yn y cyfarfodydd oedd 71% (cyfartaledd y flwyddyn flaenorol oedd 71% hefyd).
4. Roedd y materion a ystyriwyd gan y Pwyllgor Archwilio hwn yn ystod y flwyddyn yn cynnwys:-
 - Arolwg o broses cynllunio cyllideb y Cyngor
 - Cynllunio busnes y Cyfrif Refeniw Tai
 - Ad-brisio Treth y Cyngor
 - Gobeithion ariannol a'r broses cynllunio ariannol
 - Arolwg rheoli perfformiad
 - Cynllun gweithredu'r prosiect ysgolion uwchradd
 - Dangosyddion perfformiad statudol – perfformiad sy'n dirywio
 - Strategaeth Rheoli'r Trysorlys
 - Diwrnod Rasys Wrecsam
 - Llythyr archwiliad blynyddol y rheolwr perthynas
 - Adroddiadau Archwiliad Cymru sy'n perthyn i brosesau ariannol
5. Mae llawer o waith y Pwyllgor Archwilio Ariannol (Cyllid a Pherfformiad erbyn hyn) yn perthyn i fonitro ac arolygu statws, rheoliadau a gweithdrefnau ariannol Cyngor ac felly mae ei gyfrifoldebau'n gulach na rhai o'r pwyllgorau archwilio eraill (ehangwyd ei gyfrifoldebau'n ddiweddar i gynnwys arolygu materion rheoli perfformiad).
6. Canolbwyntiwyd felly ar y strategaethau a'r adroddiadau a gynhyrchwyd gan yr Adran Cyllid a Pherfformiad, yn enwedig yr Is-Adran Cyfrifeg ac Archwiliad Mewnol ac Archwiliad Cymru.
7. Yn ogystal, fodd bynnag, mae'r Cyngor wedi ymgymryd ag arolwg sylfaenol o broses gyllideb y Cyngor, cyfweld ag aelodau a swyddogion allweddol a gofyn am wybodaeth ganddynt, gan gynnwys cyn arweinwyr a dirprwy arweinwyr y Cyngor, y Prif Weithredwr, cyfarwyddwyr strategol a phrif swyddogion. Canlyniad yr arolwg hwn, a gymeradwywyd gan y Bwrdd Gweithredol, yw proses ddiwygiedig sy'n caniatáu i aelodau adnabod meysydd a gwasanaethau i'w harolygu, amserlen ar gyfer gweithgareddau allweddol a phenderfyniadau pwysig.
8. Mae'r Pwyllgor wedi arwain ar y gwaith o fonitro effeithiolrwydd y pecyn offer rheoli prosiectau hefyd, yn dilyn yr ymchwiliad a gafwyd y flwyddyn flaenorol i brosiect ysgolion uwchradd Wrecsam.

PWYLLGOR ARCHWILIO MATERION CYMDEITHASOL, IECHYD A THAI

AELODAETH 2004/2005

Cyd-gadeiryddion (2)	J W Coleman OBE	Mrs J M Lowe
Aelodau (10)	J J Colbert Gerry M Craddock F K Edwards T Alan Edwards Terry Evans	D J Griffiths K H Hett George D James F A Nichols Malcolm Williams
Cydllynydd Swyddog Arweiniol:	Karen Mills Swyddog Archwilio	
Gwasanaethodd y cynghorwyr canlynol ar y Pwyllgor cyn etholiadau Mehefin 2004 hefyd (rhwng Mawrth a Mehefin 2004):	George J Crisp J Gordon S Roberts Mrs J M B Roberts	J R Skelland Mrs J Trommelen Cyril Williams

AMODAU GORCHWYL

Gwasanaethau a swyddogaethau

- **Gwasanaethau cymdeithasol** gan gynnwys; asesiadau; gofal cartref, preswyl a dydd; oedolion ag anawsterau dysgu a/neu gorfforol; iechyd meddwl; camdriniaeth cyffuriau/alcohol; hawliau lles; pryd ar glud; therapi galwedigaethol
- **Tai** gan gynnwys: dyraniadau; casglu rhent; ôl-ddyledion; tai gwag; trwsïadau a gwelliannau; digartrefedd; llety cysgodol; safeoedd teithwyr; galwad gofal
- **Hamdden** gan gynnwys: canolfannau hamdden a chyfleusterau chwaraeon; celfyddydau ac adloniant; amgueddfeydd; datblygu chwaraeon
- **Iechyd** gan gynnwys: hybu iechyd; materion y GIG/Bwrdd Iechyd Lleol; iechyd, gofal cymdeithasol a lles

Prif gynlluniau a strategaethau

Strategaeth Iechyd, Gofal Cymdeithasol a Lles; Cynllun Gofal Cymdeithasol; polisïau a strategaethau tai.

GWYBODAETH BELLACH

Yn y cyfnod rhwng Ebrill 2004 a Mawrth 2005:

1. Cynhwysai'r Pwyllgor Archwilio Materion Cymdeithasol, Iechyd a Thai o 12 aelod (gan gynnwys cyd-gadeiryddion).

2. Bu i'r Pwyllgor gyfarfod **10** tro yn y 12 mis diwethaf.
3. Cyfartaledd presenoldeb y cyfarfodydd oedd **68%** (roedd yn 70% y flwyddyn flaenorol).
4. Mae gan y Pwyllgor Archwilio hwn gyfrifoldebau helaeth ac adlewyrchir hyn yn yr ystod eang o faterion a archwiliwyd yn ystod y flwyddyn. Fodd bynnag, yn gyffredinol, canolbwyntiodd mwyafrif gwaith y Pwyllgor hwn cyn 2004 ar wasanaethau cymdeithasol a thai. Yn ystod 2004/2005, archwiliodd y Pwyllgor nifer o eitemau'n perthyn i iechyd, gofal cymdeithasol a lles, gan gynnwys y Cynllun Gweithredu Pobl Hŷn, y Cynllun Gweithredu Maethiad a'r Cynllun Gweithredu Gweithgaredd Corfforol.
5. Cynhwysodd y materion a ystyriwyd gan y Pwyllgor Archwilio yn ystod y flwyddyn:-
 - Cyllideb y Gwasanaethau i Oedolion
 - Ffioedd cartref gofal "Pecyn Offer Pris Teg am Ofal"
 - Comisiynu gofal cymdeithasol i oedolion
 - Meini prawf cymhwyster y gwasanaethau cymdeithasol
 - Strategaeth Iechyd, Gofal Cymdeithasol a Lles
 - Cynllunio Busnes HRA – Fframwaith Ariannol
 - Cynllun cyllideb HRA ac ailstrwythuro gwasanaethau landlordiaid
 - Gwybodaeth ariannol mewn perthynas â chyfrifon refeniw tai (HRA)
 - Cynllun Gweithredu Therapi Galwedigaethol
 - Adroddiad Blynyddol Diogelu Oedolion Hawdd eu Niweidio 2003/04
 - Arolygu polisïau dyrannu tai
 - Strategaeth Dod yn Oedolion
 - Mentrau "Cartrefi Cynnes" Wrecsam
 - Strategaeth Tymor Hir – Tai Cysgodol
 - Tai Cyngor
6. Yn nodedig yw'r arolygon a wnaed mewn perthynas â'r gwasanaethau cymdeithasol (gwasanaethau oedolion). Mae'r rhain yn cynnwys:
 - arolwg o feini prawf cymhwyster y gwasanaethau cymdeithasol i greu system unedig a theg ar gyfer asesu a rheoli gofal. Yn ystod arolwg trylwyr a chadarn, rhoddodd y Pwyllgor ystyriaeth ofalus i oblygiadau sefydlu meini prawf cymhwyster a mesurau diwygiedig ac argymhellodd y dylai'r meini prawf fod yn gymedrol er mwyn cadw annibyniaeth pobl. Cytunodd y Bwrdd Gweithredol ar hyn ym mis Ebrill 2004. Bydd y Pwyllgor yn monitro'r sefyllfa yn ystod 2005 – 06.
 - arolwg tymor hir mewn perthynas â chomisiynu gofal cymdeithasol i oedolion. Mae'r arolwg hwn, sy'n dal i fynd yn ei flaen, yn ystyried effeithiolrwydd a thegwch ynghyd â materion ariannol.
 - arolwg o'r rhestr aros therapi galwedigaethol a nodwyd fel maes gwella. Gosododd y Pwyllgor darged i leihau'r broses asesu i 3 mis. Mae'r amser aros wedi gostwng erbyn hyn er bod y Pwyllgor yn dal i fonitro'r sefyllfa.

7. Ymgwymerodd y Pwyllgor hwn ag arolwg o'r Polisi Dyrannu Tai a arweiniodd at bolisi diwygiedig a gymeradwywyd gan y Bwrdd Gweithredol.
8. Mae'r Pwyllgor Archwilio Materion Cymdeithasol, Iechyd a Thai'n awyddus i annog mwy o aelodau'r cyhoedd a phartneriaid i gymryd rhan yn y broses archwilio yn ystod 2005-06. Mae cynlluniau eisoes yn eu lle ar gyfer cydgyfarfod gyda'r Bartneriaeth Aelodau a Thenantiaid ym mis Mai 2005. Mae trafodaethau'n mynd yn eu blaen hefyd i annog ein partneriaid yn y sectorau gwirfoddol ac iechyd yn Wrecsam i chwarae mwy o rôl.